

1899 - Préf. La pauriho – Valèri Bernard -

Es egau: lou fourestié, que jujarié neste Marsiho pèr li dos obro encro: Bagatouni e La Paurilio, ounte as pinta lou soutoulun de la resplendènto Foucèio, aurié de la pauraio que ié bourjouno dintre uno *laintentouso* idèio! Que de misèri, que de peiandro, que de brutice, que de vermino! léu que siéu pas de cènt lègo e qu'ai proun barrula dins lis androuno fero di quartié poupopulàri, ieu qu'en trevant., lou vièi Marsiho, siéu esmeraviha dóu *grouün* que ié viéu, dóu soulèu, que i'enébrio lou poupoplas bramaire, de l'inchaiènço ourientalo que ié fai rire li plus nus, au fla-fla di tiragno de tóuti li coulour ounte se secon si bugado, en bono fe me sèmble qu'as un pau carga la rego.
E pamens, de-sejur, es ieu que dève m'embula, car tu, moun bon Valèri, siés pintre de naturo e as un iue de pintre, implacable e cavaire. Ieu siéu un tantalòri, me leissant enmasca pèr lou rai enganiéu que fai, coume se dis en Crau, dansa la Vièio. Pièi, n'ai jamai bèn vist que la pauriho di vilage, talamen diferènto d'aquelo di vilasso qu'eici, pèr espremi la joio di galo-bon-tèms, se dis en vièi prouverbi: — Rire coume de paure!

Quand ère jouine e que restave au mas ounte siéu nascu, avian pèr vesin un brave ome que ié disien Moussu Nouvaio.

Ero un proupretàri qu'avié de belli vigno, e coume d'aquéu tèms, tèms dóu bon Diéu pèr li *chuchomoust*, lou vin n'avié ges de tirado, veici lou biais qu'avié trouva pèr chabi, an pèr an, lou jus de si vendémi. Avié, contro soun mas, fa basti un envans, un grand envans cubert de téule, ounte tenié de paio blanco, e touto la *gmsaio*, que batié lou terraire, li paure que demandon, lis estroupia, li pesoulin, li gourrin, li ribaudo que courrien la patantèino, li pelerin verai o faus qu'avien de couquiho au capèu, li gavot que vendien de graisso de marmoto o li que fan dansa li manoto emé lou pèd, quand venié la vesprado s'acampavon aqui; em'acò Moussu Nouvaio, à cha bèu poutarras, ié remetié de vin; e tout acò bevié e risié e cantavo, e se viéutavon sus la *Daio* coume de cadèu desmama, e se dins la niuchado escourtavias contro l'envans, entendias de-countùnio clanti li cacalas e li clapado, flòu! sus li gauto dóu quiéu... Risien e s'embrassavon, es bèn lou mot, coume de paure!

Mai leissen esta aquéli, qu'es ço qu'apellon li coucaro, e espinchen la vido di pàuri gènt de champ, dis ùmbli travaiaire que vivon de la journado. N'anen trouva 'no idèio dins la fiho de champ, uno simplò cansoun de Miquèu de Truchet, gènt troubaire arlaten que cantavo lou pople dóu tèms de Charle Dès:

*Siéu fiho de païsan,
Vole ana toujour au champ
Noste terraire qu'es grand
Pourra m'ócupa tout l'an.

Lou travai
Que se fai
Es toujour facile e gai:
Siauclarai,
Ligarai,
Quàuqui fes rastelarai.*

*De cardoun tóuti nouvèu,
N'adurrai de canestèu,
Vo ligarai de gavèu
Que farai bèn gros, bèn bèu.
Venemia,
Ouliva,
Tout acò fai variaia
Rapuga,
Buscaia.
N'i'a pèr quau vòu travaia.*

*Se m'apellon pèd-terrous,
Trobe pas que fugue ountous
Moun travai qu'es voulouントous
Me proucuro un sort urous.*

*Mai tambèn,
De moun tèms
Siéu libro coume lou vènt
Bravamen,
Libramen,
Change coume acò me pren.*

*S'anam liuen, vau couire au four,
Parte pèr mai que d'un jour,
Mesclou reprim, la fluor,
Moun pan a bono coulour.*

*Au saquet
Ai d'aiet,
Un rèst de cebo grousset,
Un paquet
D'agibet,
D'anchoio un coucourelet.*

*Lou dimenche est tout à iéu,
Fugue l'ivèr o l'estieu;
D'un mestre qu'es amounèu
Entènde pas lou rampèu.
Sènso eicès,
Sènso aprèst,
Frete moun pan sus un rèst
L'ame miés
Milo fes
Que d'alesti rèn pèr res.*

Vaqui ço que fasien, ço que disien, ço que pensavon li pàuri gent de 'a terro, i'a 'no cinquanteno d'an a dins lou pople èro pertout coume ço qu'as retrai, pouèto, dins aquéu gai tablèu entitula. Jouaina Famiho

*Dins la miech oumbro douço e palo
Dóu jour fali, veici papa
Qu'arribo lei bras estroupa
Emé sa vèsto sus l'espalo.*

Mai de pauriho vuei entende la pauriho que n'a que si vint ounglo, n'a quasimen plus ges au champ. I'an tant di que la terro èro lou darrié di mestié, i'an tant di qu'à Marsiho i'avié d'obro pèr tòuti e de journado bèn pagado, emé de grand café lusent, emé de Palais de Cristau e de turno e de bar un oustau l'autre noun, e qu'emé de diplomo e de certificat d'estudi poudien avé de bòni plaço, quand sarié que dins la pouliço, i'an tant di que l'oubrié èro en drudesso, en jouissuro coume en intelligènci, superior au pèd-terrous, que li patàrr de la terro, coume li noumès quauco part, soun quàsi tòuti descendu dins la vilasso de la mar; e rèsto plus dins lou campèstre que li particulié que vivon sus lou siéu, dison meme qu'eilamoundaut i'a d'endré dins la Gavoutino, que noun i'es plus resta degun, tòuti li gent an davala pèr se *marfi* dins li fabrico o vuja li jarroun di gava, di panturlo. Mai la naturo a toujour dóu vuege, e 'm' acò, qu'es arriba? Dins li vilage de l'auturo abandonna pèr li Gavot, au bout de quauquis an es arriba de Piemountés, uno raço de rapino, que trouvant lis oustau desert e li terrado

acampassido, se ié soun bravamen nisa e, au bèle èr de la mountagno, an pres la plaço di dourgas que vuei groupisson à Marsiho aqui ounte nous li fas vèire!

Fasien lis Esparciato, empega lis *Iloto*, pèr faire vèire à sis enfant lou *cativié* dis ibrougnasso. Aquéli que legiran ti pouësio aspro, es ansin, o Valèri, que veiran, à bèus iue vesènt, ço que devèn lou paure mounde dins li ciéuta descrestianado e escleirado vuei pèr l'eletricita au liò de la lumiero evangelico de Prouvènço. Mai dequé sièr? D'abord, coulègo, que cènt franc de malancounié noun pagon pas un liard de dèute, tant vau, que finiguèn pèr uno galejado d'un nouma Jan de Chazello que, i'a 'n parèu de cènts an, veici de quinte biais éu assoulavo la pauriho:

*Troupo de quinolas, ourgulhouso paurilho,
Que tant fouert d'aqueù mau moustras de vous pie
Pauretat es un mau que noun se pòu licar,
Mai noun óufenso pas l'ounour d'uno familho.*

*Au countràri, leis dènts que monestro la roupilho
D'un paure que pertout se laisso publicar,
Soun d'armos que lou fan talamen respectar
Qu'es un grand cop d'asard si quaucun leu goupi*

*Éu pòu sènsa regrèt roudar tout l'Univers
E leissar soun oustau. e seis cofres duberts,
Fau bèn pèr lou voular qu'un larroun siege abile.*

*Tambèn pèr cadenau n'a besoun que d'un fléu,
Pueisque lou sèu dòn rèi serié meme inutile
Ounte la pauretat a dejá mes lou siéu.*

Escuso-me, moun bèu, d'avé jita coume acò aquel espousc de *gaieta* sus li garamaudo de tis aigo-fort.
Noun es-ti pas fa aquesto cansoun?

*Se sian gus, sian countènt
N'es pas l'argènt que nous embarrass.
Se sian gus, sian countènt
N'es pas l'argènt
Que rènd countènt.*

F. Mistral

© CIEL d'Oc – Juliet 2009